

◎涅槃四種大樂

《三藏法數》——出《大涅槃經》

- 一、無苦樂。無苦樂者，謂無世間之苦樂也。世間之樂，即是苦因。故經云：「不斷樂者，則名為苦。以斷樂故，則無有苦。無苦無樂，乃名大樂。此即涅槃之大樂也。」
- 二、大寂靜樂。謂涅槃之性，是大寂靜。以其遠離一切憤鬧法故。以大寂靜名為大樂，此即涅槃之大樂也。
- 三、大知樂。謂諸佛如來有大智慧，於一切法悉知悉見，名為大樂。此即涅槃之大樂也。
- 四、不壞樂。謂如來之身，非煩惱無常之身，猶如金剛，不能毀壞，身不壞故，名為大樂。此即涅槃之大樂也。

◎涅槃八味

《三藏法數》——《出方等般泥洹經》

涅槃梵語，具云摩訶般涅槃那，華言大滅度。大即法身，滅即解脫，度即般若，是乃三德秘密理藏也。此之理藏，在諸佛不增，在眾生不減，而有八種法味，故泥洹經立此八味之名也。（法味者，謂諸法中之義味也）

- 一、常住。謂此涅槃之理，徹三際以常存，亙十方而常住。故曰常住。（三際者，即過去未來現在三世也。十方者，四方四維上下也。）
- 二、寂滅。謂此涅槃之理，寂絕無為，大患永滅，故曰寂滅。
- 三、不老。謂此涅槃之理，不遷不變，無增無減，故曰不老。
- 四、不死。謂此涅槃之理，從本不生，今亦不滅，故曰不死。
- 五、清淨。謂此涅槃之理，安住清涼，諸障悉淨，故曰清淨。
- 六、虛通。謂此涅槃之理，虛徹靈通，圓融無礙，故曰虛通。
- 七、不動。謂此涅槃之理，寂然不動，妙絕無為，故曰不動。
- 八、快樂。謂此涅槃之理，無生死逼迫之苦，有真常寂滅之樂，故曰快樂。

◎ 柔和質直者

《佛學大辭典》

意柔而隨順於道，心正而無偽曲者。法華經壽量品曰：「諸有修功德，柔和質直者，則見我身在此而說法。」

◎ 四攝利益

《三藏法數》——出《大集經》

- 一、佛攝利益。謂佛攝持眾生，令其常得親近諸佛，諸魔不得其便，故名佛攝利益。
- 二、天攝利益。謂諸天攝持眾生，於說法之處常樂聽受，不為他緣所害，故名天攝利益。
- 三、福攝利益。謂福德莊嚴於身，有諸相好；莊嚴於口，凡所演說，眾生樂聞；莊嚴種姓，令生尊貴，故名福攝利益。
- 四、智攝利益。謂以智慧知眾生根性，隨宜說法；知眾生病苦，隨病施藥。得大神通，遊諸佛土，了了通達法界之理，是名智攝利益。